

630 milliuns gudogn da manaschi

La Posta: Dapli trasparenza

DA LUCAS DEPLAZES / ANR

■ **L'onn passà ha La Posta fatg ina rendita da manaschi da 630 milliuns francs ed in gudogn net da 420 milliuns francs. Il resultat finanziàl è stà influenzà da las turbulenzas enturn il sectur da l'Auto da Posta.** A chaschun da la conferenza da medias dad ier a Berna ha *Urs Schwaller*, il president dal cussegl d'administraziun, punctuà ch'el pretendia cumplaina trasparenza davart il cumportament sbaglià sin il sectur «Auto da Posta». Schwaller è satisfatg dal bun resultat da manaschi da La Posta. Quest resultat saja stà pussaivel grazia al grond engaschi dal persunal. La Posta haja adempli cumplainamain fas finamiras dal cussegl federal. Deplorablamain saja il manaschi stà influenzà dad illegalitads tar la partiziun «Auto da posta». Schwaller pretendia trasparenza e consequenzas en cas da malfatgs.

Solida situaziun finanziàla

La Posta dispona d'in agen chapital da 6,6 milliardas francs. Ella po finanziar tut las investiziuns – l'onn current 394 miu. francs – cun agens daners. Il cussegl d'administraziun propona da surdar a la cassa da la confedraziun puspè 200 miu. francs. Surlonder possian ins discutir, ha concedi Schwaller e fatg attent che actualmain sajan diversas intervenziuns politicas en il parlament. Sche la politica pretendia dapli prestaziuns da La Posta stoppia ella er metter a disposiziun ils meds finanziari persunter, ha fatg attent Schwaller.

Traffic postal

L'onn 2017 ha La Posta fatg in retgav da gestiun da 7987 miu. francs. Sco ils onns passads è sa reduci er l'onn 2017 il dumber da las brev per 4,2% ed ils pajaments al spurtegl per 6,5%. Las brev, sutta-



Urs Schwaller, il president dal cussegl d'administraziun, e Susanne Ruoff, la CEO dal concern, han pudì preschentar in bun rendaquint da manaschi per l'onn passà.

KEYSTONE

messas al monopol fin 50 g, muntian anc adina ina basa solida da finanziaziun, ha constatà *Susanne Ruoff*, la CEO dal concern. In augment da 6,2% po La Posta nudar tar il pachets. Il traffic ha cuntanschì l'onn passà 130 milliuns pachets grazia al traffic online. Quest martgà stettia dentant sut in enorm squitsch davart la concorrenza.

Rait dals uffizis da posta

La Posta dispona da la pli ferma rait d'uffizis da posta da l'Europa. L'onn passà stevan a disposiziun a la clientella 3870 puncts d'access. Fin l'onn 2020 vul La

Posta augmentar quest dumber sin 4200. Quest svilup da la rait duai tegnair quint dals novs basegns da la clientella. La rait dals uffizis da posta fetschia in deficit da 160 miu. francs. Finamira saja da pudair reducir quest deficit sin var 100 miu. ha ditg Schwaller. La Posta vul adattar la rait en in dialog constructiv cun la populaziun pertutgada, ha accentuà Schwaller.

Investiziuns en il Grischun

Fin l'onn 2020 vul La Posta investir 150 miu. francs en trais novs centers regiunals per il traffic da pachets, numnadamain a Vaz Sut, a Cadenazzo en il Tessin ed a Vé-

troz en il Vallais. Il center regiunal da Vaz Sut duai funcziunar gia davent da l'onn 2020. Cun quests centers da repartiziun vul La Posta investir en las regiuns periferas e pudair dar dumogn al traffic dals proxims onns.

PostFinance

L'onn 2017 ha fatg PostFinance in retgav da gestiun da 549 miu. francs, quai che munta in augment da 7% en cumparaziun cun l'onn 2016. La situaziun actuala cun tschains negativs sin gronds chapitals muntia ina grevizza per PostFinance che na po betg porscher ipotecas. Post-

Finance vul investir en la digitalisaziun ed esser bain preparada per il futur, ha accentuà *Hansruedi König*, il CEO da PostFinance.

Persunal

L'onn 2017 ha La Posta dà lavur e gudogn a var 60 000 persunas. Da quellas èn occupadas 7467 en l'exteriur. Actualmain fan 2115 giuvenils in emprendissadi tar La Posta. L'occupaziun tanscha davent dal portabrevs tar il logisticher fin l'informaticher. La Posta ha mess a disposiziun a la cassa da pensiun bunamain ina mesa milliarda francs.

PostAuto Schweiz AG: Absolutamain inacceptabel

Urs Schwaller, il president dal cussegl d'administraziun, ha considerà il cumportament sbaglià en il sectur «Auto da Posta» durant ils onns 2007–2015 sco absolutamain inacceptabel. Per garantir l'indipendenza da l'inquisiziun ha incumbensà Schwaller trais experts. Il collegi giudizial consista da l'anteriur directur da la controlla federala da finanzas, *Kurt Grütter*, dal professor dal dretg penal, *Andreas Donatsch* e *Felix Uhlmann*, professor da dretg public e dretg administrativ, omadus professors a l'Universitad da Turitg. Sin fundament dals resultats da l'inquisiziun vul Schwaller trair las consequenzas organisatoricas e persunalas. Quai saja impurtant ch'il concern possia sortir or da questa situaziun excepziunala. «Jau vi ina posta seriusa!» ha ditg Schwaller.